

Obraćanje zamjenika predsjedavajućeg Doma naroda PSBiH Kemala Ademovića na obilježavanju 15. jula – Dana demokratije i nacionalnog jedinstva Republike Turske

Sarajevo, 15. juli 2026.

“Poštovani ambasadore Republike Turske, uvažene ekscelencije, poštovani gosti, dame i gospodo,

Velika mi je čast i zadovoljstvo što danas imam priliku biti s vama na obilježavanju 15. jula – Dana demokratije i nacionalnog jedinstva Republike Turske, te u ime Parlamentarne skupštine Bosne i Hercegovine zahvaliti na pozivu da se obratim ovom uvaženom skupu.

Danas se navršava deset godina od događaja koji je ostavio dubok trag u savremenoj historiji Republike Turske. Tog 15. jula 2016. godine građani Turske pokazali su odlučnost, hrabrost i privrženost demokratskim vrijednostima, štiteći ustavni poredak i institucije svoje države. Posebno odajemo poštovanje svim onima koji su izgubili živote i iskazujemo solidarnost s njihovim porodicama.

Deseta godišnjica nije samo prilika za sjećanje, već i za potvrdu univerzalne poruke da su demokratija, sloboda i vladavina prava vrijednosti koje zahtijevaju stalnu zaštitu i zajedničku odgovornost.

Republika Turska je važan i iskren prijatelj Bosne i Hercegovine. Naše dvije zemlje povezuju snažne historijske, kulturne i ljudske veze, ali i zajednička opredijeljenost za mir, stabilnost i razvoj. U vremenu složenih geopolitičkih izazova, kada se međunarodni poredak suočava s brojnim iskušenjima, dijalog, međusobno uvažavanje i saradnja imaju veću vrijednost nego ikada prije.

Turska danas nastavlja igrati značajnu ulogu u promoviranju regionalne stabilnosti, jačanju međunarodnog dijaloga i pružanju podrške partnerima širom svijeta. U Bosni i Hercegovini posebno cijenimo kontinuiranu podršku razvojnim projektima, ekonomskim vezama i očuvanju mira i stabilnosti.

Neka nas sjećanje na 15. juli podsjeti da su jedinstvo naroda, snaga demokratskih institucija i međusobna solidarnost temelj otpornosti svake države.

Dozvolite mi da, još jednom, uputim iskrene čestitke građanima Republike Turske povodom Dana demokratije i nacionalnog jedinstva, uz želju da Turska nastavi svoj put mira, prosperiteta i uspjeha, a da prijateljstvo između Bosne i Hercegovine i Republike Turske bude još snažnije u godinama koje dolaze.”